

E Kolder muss merr hawwe

Su jetz um die Zeit unn iwwer de Winder enaus muss merr e Kolder im Bett hawwe, also e Kuld, wie die ahle Flerschemer gesaad hawwe. Bei uns hadd korrz vor Ostern die Fraa all unser Koldern inneme Schronk im Wohnkeller unnergebroschd, weil merr se joo im Summer nitt brauche dun, unn jetz habb ich zwaa vunn dene eruffgehollt. Ess iss halt enn Unnerschied, wennde owends ins Bett krawwelle dust unn konnsderr die Kolder bis unners Kinn ziehe, als dess meddere Bettdeck ze mache, weil e Kolder hält halt schneller warm als e glatt Bettdeck, die de long oowärme musst.

Unn warum dess? Weil e Kolder emm Fell vunn de Diern noochemfunne iss. Wie bei emm Fell vunn de Reh unn Hase, die im Winter im Feld odder im Wald nooch Futter suche misse, dut e Kolder funktioniern: Weil Luft gut isoliern dut, werdd se bei de Diern zwische de Hoorn im Fell unn bei de Kolder zwische dene krusselische Fädscher festgehalle unn ewe nor die lockere Fädscher werrn schnell vumm Körper uffgeheizt. Monschmol kimmt oom su e Kolder e bissi schwer vor, donn dusde se halt su unne ins Bett leesche, dass die Fieß warm bleiwe.

Nooch dem Prinzip, Luft als Isolierung ze nutze, sinn aach die Hohlblockstoo unn die rote Porotonstoo zum Baue von Heiser gemacht. Die sinn voller Luftkommern, nor grad su vill, dass die Stoo späder in de Wond nitt unnerm Gewicht vunn de Zwischedecke unn de Mauern zesommekrache dun.

Unn bei jedem Fußballspill siehsde die Reservissde uffere Bonk sitze unn sich in Koldern oiwiggele, sugar midde im Summer, weil die Sportler misse halt ihr Gelenke warm halle, wenn se späder oigewechseld werrn

Vunn de Diern gibt's noch mieh iwwers Fell ze saache, heit nor su vill: Enn Fischotter hott uff oom Quadratcentimeter Haut 80.000 Hoorn mett Luft dezwische, dessdeweese kimmt koo Wasser dorsch unn de Otter kann unnerm Eis nooch de Fisch tauche. Unn emm Eisbär soi Hoorn sinn inne hohl unn voller Luft unn su e Art Hoorn kenne schnell vunn de arktisch Sunn uffgeheizd werrn. Uff de onner Seit vunn de Erdkuuchel hawwe die Pinguine e Gefieder mett dichte Daunefedern. Unn zwische dene ihrne Fedderäst werdd Luft oigelagerd, die dem Pinguin aach bei antarktische Temperatur unn im eiskalte Meerwasser die Körperwärme festhält.

Im Geeschedeil doodezu duts die Rettungsdecke gewwe, die wie Goldfolie aussehe dun unn die inne wie auße gons glatt sinn. In jedem Krimi, in dem oo odder ooner ins Wasser gefalle iss, sieht merr, wie die Sonideeter mett su ooner Deck oogerend kumme, um de nasse Menschekörper ze schitze, weil su e Folie dut die Körperwärm festhalle, die sunnst in die Luft abgewwe worrn wär.